

Celebrando Dia di Prensa Arubiano

Dedica na Aloysius 'Djiespi' Franken, un gran periodista y fotografo di prensa Arubiano

Mi no ta periodista di profesion, pero considerando e centenares di relato pa prensa cu mi a prepara pa mas di 25 aña pa Aruba Scholarship Foundation y durante seis aña pa Rode Kruis Aruba y tumando den cuenta cu mi a skirbi y publica mas di shen articulo den e ultimo dies añanan, mi ta considera mi mes un periodista, aunke no paga.

pa: Clyde Harms

Awe, dia 1 di september 2014, mi ta celebra hunto cu mi amigonan periodista profesional, nos Dia di Prensa. Mirando lo ke ta pasa den henter mundo, nos tin hopi motibo pa celebra aki na Aruba! Aña pasa mas di 70

periodista a haya nan morto den forma cruel tratando di trece noticia for di tur skina di mundo. Centenares a wordo cera pasobra nan a expresa opinion cu ta bay contra e regimen di e pais caminda nan ta traha. Na algun pais, television, radio y corant ta wordo horca sistematicamente. Corantnan no ta haya divisa pa cumpra papel. Stacionnan ta perde e derecho di transmiti y otronan ta wordo expropia. Leynan ta wordo pasa cu ta sirbi di bosal pa tur periodista.

Y si no logra silencio e medio di comunicacion cu e medidanan aki, gobierno den un forma clandestino pa via di compania y banco stranhero ta cumpra e medio, uzando miyones di dollar cu por a wordo uza pa alivia e

scarsedad di cuminda y remedi cu e pueblo ta sufri.

No ta duna importancia
Danki Dios cu aki na Aruba ainda nos tin libertad di expresion y nos por celebra Dia di Prensa. Pero, mi ta puntra mi mes, di berdad nos ta interesa den celebracion di e dia of por lo menos conmemora? Corantnan ta sali cu edicion special y ta haya hopi anuncio di felicitacion (contribucion) di mayoria di comerciante, pero, atrobe mi ta puntra, esaki ta manera cu nos mester celebra esun dia di aña asina importante di periodista Arubiano? Un tempo tabata organisa foro y trece periodista di fama regional pa duna charla. Un tempo tabatin un asociacion di periodista cu tabata organisa evento special, pero e

asociacion mes a bira victima di e falta di interes. Ta parece mi cu nos Dia di Prensa mester wordo celebra den un forma cu mas substancia cu ta duna mas balor y significacion na e profesion di periodismo. Un brindis of un lunch den grupo no ta duna e importancia cu e dia special aki merece.

E aña aki hunto cu mi palabranan di felicitacion na tur periodista di Aruba, mi ta rindi homenahe na un gran periodista Arubiano, e inigualabel 'Djiespi' Franken pa su logronan den periodismo. Y mi ta expresa mi deseo y speransa cu pronto e asociacion di periodista lo rebiba pa representa tur medio di comunicacion social y tur periodista. Mi ta dispuesto pa yuda: clydeharms@yahoo.com. □